



Sai:
Bi ngeih lingz ngeih lingz,
Sing geizheih okda,
Haemhndaep miz luemjbyaj,
Lajmbwn caen noix raen.

Mbwk:
Daj ciuh laux roengzdaeu,
Caengz nyi naeuz yiengh gvaq,
Haemhndaep miz luemjbyaj,
Lajdeih mbouj bingzan.

Sai:
Mbouj caengz daengz yauhewn(cin),
Gwnz mbwn byajraez byet,
Yiengj lumj mbwn yaek dek,
Beksingq sim dai luenh.

Mbwk:
Haemhndaep byajraez yiengj,
Siengj daengz bouxboux ndaenq,
Haemhndaep byajraez maenj,
Raeuz yaek raen cainanh.

Sai:
Haemhndaep couh doek rit,
Coit couh byajraez,
Seizcin baenzlai gyae,
Byajraez daeuj bauq nanh.

Mbwk:
Haemhndaep couh doek rit,
Coit couh byajraez,
Ciuh geq daengz banneix,
Ngeix dauq caengz raen gvaq.

Sai:
Bi ngeih lingz ngeih lingz,
Gwnz biengz mbouj bingzan,
Binghlah dauqcawq sanq,
Bouxboux fanz yaek dai.

Mbwk:
Ngeihcib bi duznou,
Raeuz gven dou ganggijoj,
Gwnz biengz fat bingh moq,
Guek raeuz cungj rox caez.

Sai:
Binghlah fwt daeuj daengz,
Vunz mbanj caengz raen gvaq,
Mbouj haeujsim deng lah,
Raeuz vajaw(danqheiq) linlin.

Mbwk:
Binghlah fwt daeuj daengz,
Mbanjmbanj baenz riuz doh,
Bingh neix dwg bingh moq,
Raeuz baenzlawz goq mingh?

Sai:
Dangcunghyangh doxyaeng,
Daengx guek daeuj ok rengz,
Fung singz youh fung geng(geuq),
Mbouj hawj deng binghlah.

Mbwk:
Binghlah neix caen yak,
Miz boux gimq bak ndaeng,
Caj canghyw daeuj daengz,
Caengh ndaej gouq diuzmingh.

Sai:
Bouxdaeuz youq baihgwnz,
Son vunz guh fuengzre,

Bouxlaux caeuq lwgnyez,
Cungj re ndei cij baenz.

Mbwk:
Bouxdaeuz youq cunghyangh,
Gangj vah raeuz couh dingq,
Roengzsim daeuj re bingh,
Mingh raeuz cij gyaeuraez.

Sai:
Ngoenz haidin okdaeuj,
Yaek aeu daiq goujcau,
Bae gizlawz doxdauq,
Swiq fwngz hau cij youq.

Mbwk:
Daiq goujcau okdou,
Mbouj lau bingh haeuj ndang,
Raeuz dingq dangjcunghyangh,
Gangj gohyoz fuengzre.

Sai:
Mbanjmbanj miz vunz souj,
Gizgiz fung dou roen,
Binghlah neix mbouj goenq,
Raeuz hoenxcienqgq mbouj dingz.

Mbwk:
Mbanjmbanj miz vunz souj,
Doudou miz vunz hen,
Bouxlawz guh mbouj deng,
Roengzrengz daeuj son'gyauq.

Sai:
Hujgeiq mbouj doxvaij,
Vunzlai mbouj doengz naengh
Gekliz guh ndaej daengz,
Caengh gemjnoix binghnanh.

Mbwk:
Beixnuengx yaek doxra,
Aeu dienhvah doxdoeng,
Baengzyoux yaek hwnjroengz,
Doeng vah cingz hix naek.

Sai:
Boux guh laeuj guh caz,
Gaej yungh ra hujgeiq,
Aen bingh gig geizheih,
Guh mbouj ndei baihgya.

Mbwk:
Miz fangzdai vaiznit,
Ittingh aeu haeujsim,
Noix daeuj geij bouxcin(caen),
Ndaej gemjnoix binghnanh.

Sai:
Cungh ,sihyih doxgap,
Fanriep caeuq fandenz,
Gwnzlaj miz doxgven,
Raeuz nenq(geiq) youq ndawsim.

Mbwk:
Ywhek gap ywdoj,
Raemxmboq caeuq raemxdah,
Aeu daeuj yw binghlah,
Lajmbwn riuz Cungguek.

Sai:
Gyoengq canghyw miz sim,
Yamqdin haeuj Vujhan,
Roengzrengz gouq binghnanh,
Hwnzngoenz ganq mbouj dingz.

Mbwk:
Gak aen yihliuzdui,
Miz bouxoiq bouxlaux,
Sinhoj hix mbouj lau,
Bauj guekcoj bingzan.

Sai:
Yihliuzdui dwggyaez,
Miz saeh buet bae gonq,
Yienghyiengh dingq dangj son,
Bauj Vujhan onjdingh.

Mbwk:
Gyoengq gungh'anh bouxbing,
Engq miz sing miz saek,
Mboujlwnh saeh mbaeu naek,
Yienghyiengh gaek haeuj sim.

Sai:
Dangj gvensim cibfaen,
Ngaenzcienz soengq daengz ranz,
Lwgminz raeuz lungz nanh,
Gungcanjdangj guh daengz.

Mbwk:
Cunghyangh guh ndaej ndei,
Doengzcaez daeuj ganqguenj,
Cainanh hix mbouj luenh,
Suenq Cungguek maenh'ak.

Sai:
Gyoengq lwglan guek raeuz,
Mizmbangj youq diegroq,
Raen daengz binghlah ok,
Buekmingh daeuj bangcoh.

Mbwk:
Gyoengq lwglan youq rog,
Caenhsim daeuj ok ngaenz,
Ndiep beixnuengx cibfaen,
Aencingz geiq mbouj lumz.

Sai:
Bouxdaeuz youq cunghyangh,
Gangj coenzcoenz miz leix,
Son lwgminz baenz meiz(miz),
Saeh neix bouxboux haenh.

Mbwk:
Cunghyangh guh ndaej cingq,
Raeuz beksingq bingzan,
Vunzlai mbouj deng nanh,
Raeuz fanh daih mbouj lumz.

Sai:
Fuengzre aeu maedsaed,
Ndaetndaet daeuj hensouj,
Bouxboux guh ndaej daeuj,
Cij mbouj souh cainanh.

Mbwk:
Miz bingh couh aeu fuengz,
Hong hix gaej cuengq soeng,
Bingh neix bingh mbouj doengz.
Loeng gvaq seiz couh baih.

Sai:
Raeuz miz cai miz nanh,
Gungcanjdangj venj sim,
Soengq cien ngaenz fanh gim,
Raeuz gwn imq daenj raeuj.

Mbwk:
Beksingq caeuq bouxdaeuz,
Ukgyaeuj hix daezsang,

Bouxboux dingq cunghyangh,
Dwk binghnanh roengz caez.

Sai:
Cungguek gohyozgyah,
Lajmbwn cungj riuzmingz,
Baengh gohyoz yw bingh
Vunz gingq lumj bohme.

Mbwk:
Guekcoj raeuz ak lai,
Seiqgyaiq cungj riuz doh,
Yienghyiengh miz gohyoz,
Lohloh guh ndaej daengz.

Sai:
Boux husw dwggyaez,
Netsim bae bangcoh,
Yungyiemj hix mbouj ndoj,
Roengzsim goq bouxbingh.

Mbwk:
Dwggyaez gyoengq canghyw,
Moekrwz bae yw bingh,
Doeklaeng hoenx ndaej hingz,
Bauj ndaej mingh vunzlai.

Sai:
Bi ngeih lingz ngeih it,
Yaepyit youh daeuj daengz,
Raeuz aeu lai doxyaeng,
Baenzlawz caengj(souj) binghlah.

Mbwk:
Ngeih lingz ngeih it nienz,
Raeuz gaenq cienz ndei liux,
Yienghyiengh ciuq bi'gvaq,
Fuengz binghlah daih'it.

Sai:
Miz dangj daeuj lingj dauj,
Raeuz lau gijmaz lo,
Yw bingh miz gohyoz,
Bingh mbouj rox haeuj ndang.

Mbwk:
Vah dwg baenzneix gangj,
Raeuz dingq dangj cij baenz,
Miz cunghyangh gaemgaenz,
Lwgminz aeu gaen ndei.

Sai:
Binghlah dwg daihsaeh,
Mbouj ndaej guh bunye(ruprap),
Gaej gangj vah lwgnyez,
Aeu rox re rox fuengz.

Mbwk:
Binghlah dwg saeh hung,
Cuengq haeuj dungx haeuj saej,
Fuengzre guh daengz daej,
Mbouj heiq bingh hwnj ndang.

Sai:
Geij cien daih roengzdaeu,
Guek raeuz lau gijmaz,
Vunzdig lumj go'nya,
Gaj liux caez liux doh.

Mbwk:
Geij cien daih roengzdaeu,
Guek raeuz lau gijmaz,
Miz dangj daeuj dang gya,
Binghlah raeuz mbouj lau.